



秋澗先生大全集卷第八十九

烏臺筆補

舉河南士人陳天祥事狀

今體訪得河南府士人陳天祥沈正有為達於從政  
隱居嵩少相近十年讀書種田不求仕進中統三年  
大名宣慰司曾將天祥擢充新軍千戶勾當鎮守三  
汶等處聊復効用已有能稱今國家經畧江漢得才  
爲急其陳天祥久播學優之譽適丁強仕之年合無  
就令河南行中書省舉用以試所長

爲盜賊糾治真定官吏事狀

今體訪得真定府即日群盜公行或竊或劫無所畏  
避據前月上半月內一夜之間失事者凡二十餘處



如高奴千戶任子齊等家縱火恐喝盜取財物是也其府官司巡捕無方但薄暮聲鐘辨明啓閉使闔城之民遇夜驚懼寢處不安顯見府司官吏罷慢不職威令莫行不能消弭擒制以至如此且真定爲燕南劇鎮又連年蝗旱艱於衣食者衆此風大不可長參詳上司若不早爲規畫督責官吏嚴行禁止切恐因而別生事端深繫利害據此合行糾呈

請禁治穢惡語言狀

切見中都市井小民行言立語多作穢談以至父子兄弟不能迴避行歷切恐久而成俗以爲尋常據穢濁風俗莫此爲重參詳係有司不能肅清所部以至如此兼京兆風俗之厚合行禁止以革薄俗

論居官身故等官員子孫承廢事狀

會驗中書省欽奉

聖旨條畫內一款諸取廢官不以居官去任致仕身故其承廢人年及二十五以上者聽照得今者身故官員子孫已擬叙廢其居官去任子孫應廢者至今未見施行外據致仕官子孫往往亦未蒙定奪如真定張宣撫子復前泰安州尹趙德庸子符是也年職參詳即今貪冒成風恬不知退如一二以理致仕者宜蒙顯異若應廢子孫返爲遲疑不蒙定擬祇以身或者聽叙是使爲子孫者得父祖早故爲幸非所以進廉隅而激貪鄙也兼照得舊例諸養素立園徵聘不赴者子孫尚得以徵官爲廢况成官清要歷年深



遠之者理合比父祖身故者即令叙蔭為當其居官  
去任子孫亦合依奉  
聖旨條畫定奪施行

為救治虫蝗事狀

蓋聞天災流行

國家代有氣和則致祥氣乖則致異此必然之理也  
然災有大小而蝗旱為最今會驗得隨路節次申蝗  
蝻生發至今月內計二萬一千九百三十三頃四十  
三畝除已絕外未絕一萬五千八百六十二頃三十  
三畝又有不見頃畝一百餘處災深不已深為可憂  
如比年以來山東等處連值蝗旱民至有麵糠實掘  
黃精煮野菜而食者雖包銀權倚而盡微到官課額

訴難而依前恢辦向非

聖恩賑濟鮮不飢殍轉死溝壑今者蝗之氣勢滋盛  
如此是上天之意儆戒深至誠不可不謹苟非以德  
勝妖全藉人力恐百姓重困過於前日其為利害孰  
大於斯今來叅詳其或大臣不和政事有關官吏不  
公百姓失所刑賞雖行而或疾風俗極惡而未醇又  
如各路見禁一千三百餘人幽閉囹圄不無冤滯加  
之用兵興役僉軍屯田包添絲銀協濟軍力分房益  
戶輸粟餉邊遠近騷然未為無事從是而觀致傷和  
氣恐此之由而又延南州郡蚕麥薄收嗷嗷之民止  
望秋成以供王事不幸繼以蝗旱萬一成災將若之  
何豈惟經費不足貧民衣食先乏衣食乏則飢寒至



飢寒迫則盜賊生盜賊滋則非國家之便也竊見朝  
省近年已來救捕雖力終莫殄絕不過差官督責州  
郡併功撲滅不致流獫而已未有以時事言者以其  
愚見爲大臣者當恐懼修省恪謹天戒任責極言陳  
其所以不然切慮朝廷不能盡知何則方今  
明天子在上聖慈仁惠子愛兆民哀矜憫卹軫慮惟  
切今災異如此又恐遠方小民不知存恤之意誠宜  
緩不急之務下寬大之

詔發倉廩振貧乏致禱山川爲民祈謝據被災去處  
驗其輕重量減今歲差稅又宜先遣相臣分省中都  
使鎮撫中外規畫事宜以安以慰庶望京畿之間民  
心妥帖物不踴貴災沴漸消民易爲力不致重困因

而別作事端

爲犧牲在滌不及九旬事狀

蓋聞國之大事實先祀典祀禮以敬爲主物品以潔  
爲先故唐金之制大祀養牲在滌九旬中祀二旬今  
體知得太廟歲祀犧牲有司臨時取辦在滌不及兩  
月即用就事看詳三牲之養遠期三月本欲盡誠敬  
而極精潔也今者大祀之禮降而甫踰中制於理寔  
爲未應誠有司之慢也合無照依舊例改正施行

舉陝西儒士楊元甫狀

伏聞國朝議國學教胄子遴選師儒以克司業助教  
博士之職切見京兆儒士楊恭懿資稟高明學淹經  
史千言過目成誦不遺今年幾知命教授鄉閭其考



行足以化服一方其廉介足以振勵薄俗隱德立國  
不求仕進如往者兩省交辟欲置之幕府庶諮論議  
以勸將來至職名祿養辭皆不受德業日新筆馭自  
若誠清廟之珪璋士林之杞梓也其或擢彼國庠置  
之館閣試其行能可收實用又念即今上而監司下  
而州郡凡所薦舉多蒙省錄其在憲臺尤宜獎率伏  
乞詳酌施行

為罪囚醫藥事狀 許敬行

體訪得大興府在禁罪囚自今年二月初至今月二  
十日節次死訖二十一人俱係因病身故切詳見禁  
四百餘人又照得隨路已立司獄官三十餘處即日  
暑氣蒸騰病者甚衆雖官差醫士輪流看治合用藥

物悉皆自備如遇重證止是依例應付實非對證條  
合以致往往耽誤人命又念犯得罪當死不可於未  
鞠問及抵法以前因醫庸藥闕而以病殺之也其間  
雖有免濫當宥之人悔將何及檢會舊例獄囚病患  
官給醫藥救療合無將應用藥餌官為收買給付獄  
官臨時對證用度庶望不致耽誤死損人命

論成造衣甲不宜責辦附餘物料事狀

伏見

國家即日征伐四出所除甲器取為重事緣甲不如  
法所係人心勇怯勝負關於一時故晁錯有云甲不  
堅密與祖楊同今體察得在都甲局并外路今年納  
到至元六年常課皮甲斤重不同者在都局有三十



五斤及三十七八斤者真定順天東平等處却重四  
十斤四十一二斤者斤重既是爭懸生活不無好弱  
又體知得省部遍下隨路四十餘局取要排年附餘  
數目但有未便者若上司元降物料一切合宜不當  
取要附餘既取附餘是元降物料上司不曾確實計  
料有無相應致有多餘之數若此是在有司立法當  
與不當耳至如弓局舊例每弓一張物料錢鈔兩貫  
文有傳忽都告減作一貫二百文

聖旨為文遠生活上定作一貫四百文造弓一張上  
司既無打算工匠又甚便當早職參詳今後亦合將  
衣甲事理再行定奪實用酌中物料使一切合宜及  
甲之斤兩定擬畫一俾例得成造如法其少有不

甲程度者嚴行究治可也不宜責辦附餘以致官匠  
兩難兼衣甲難比其餘器械所貴堅良精緻及主者  
之功匠氏之能也若專以要取附餘為功不以甲之  
好弱為念一旦用之陣敵斷不能遮護身體有悞人  
命是有司以附餘為重以人命為輕也據此合行具  
呈

彈阿海萬戶屯田軍人侵占民田事狀

欽奉

聖旨條畫內一款該兼并縱暴及貧窮寃苦不能自  
伸者委監察並行糾察欽此今察到武清縣北鄉等  
處有阿海萬戶下屯田軍人於至元二年倚賴形勢  
於上司元撥屯田地段四至外強將諸人莊子及開



耕作熟桑粟地土侵奪訖二十餘頃俱是各家係稅地數往年雖經陳告總管府行下本縣歸着本縣累次約會本官不到至今不曾吐退就責得各地主狀供與所察相同卑職看詳本鄉兩面河占中間地土窄狹今者強為軍人奪占使農民至有失業者所謂兼并縱暴貧弱冤苦不能自伸者莫此為甚據此合行糾彈伏乞御史臺照詳施行今將侵占訖諸人地段數目開具如后

彈西夏按察司行移違錯事狀

今體察得西夏中興提刑按察司於今年二月內為本處納憐等站脫脫禾孫等告鋪馬瘦弱見無料食請補詞申覆戶部為此追照行卷與所察相同今來參詳各道按察司凡有合申事理即令申臺照詳即與六部元無行移體例今有西夏中興提刑按察司官署街連名不經御史臺徑為申覆尚書戶部作為不應據此合行具呈

論渾河泛溢請修治堤堰事狀

伏自今月內武清縣北鄉按部回至洪濟鎮渾河泛漲其瀕水民家已為湮沒若湯湯不已大有可慮者因行視堤堰水勢東南至孫家務西北至本鎮南東西橫亘約十五餘里其堤堰低狹高闊不過丈餘又年深頽剝衝渲一土埦而已河水伏槽時視堤南平地尚下數尺兼土脉踈弱水性善崩黃猫野鼠穿穴又多固不足以禦大患擇水衝萬一泛決沛然莫禦



而堤南二十餘村人畜田廬盡為漂沒其害又非虫蝗之可比也就問得孫家務一帶去年秋已被災傷但不致太甚耳外據灤陰縣東北沙渦口等處畧與武清縣北鄉事勢相同即目縣西北近河堤南田禾已在水中及有滄死頭畜合無專令各縣正官一員晝夜巡防隄備破決但望不致踈虞才候農隙令都水監官相視堤岸踈惡去處如法修築使一方永逸以絕水患寔畿內兩縣之大利也其職當司察親覩利害不敢緘默自取言責據此合行具陳

請立四方館事狀

伏見遠方朝貢使人每歲至京師者既無館舍以處輒於民間豪貴之家倉皇安置但有未便堂蓋堂

大國不以全盛之勢昭示遠人一也既擇朝官館伴豈非示其文物有人然處之民家殆非得體又兼無窺測民間事情以見淺深二也至於騰移房室紛爭與奪之際致被竊笑三也如近日交趾使人通侍大夫黎仲陀中散大夫丁拱垣等館於王子華宅比及安置使貢物狼籍于外者是也合無建立四方館以一切奉使處之如此不惟聖朝盡懷遠遇下之禮抑使遠方來者觀上國之光我免夫三者之虞寔為便當

彈漕司失陷官糧事狀

欽奉

聖旨條畫節該倉廩減耗為私蠹害委監察並行相



察欽此伏見國家歲計糧儲必須百有餘萬方可足用朝廷為恐中間失悞爰自往年特改漕司併令劉暹等提舉一切勾當故合設官吏內外必備奉給又為不輕所期盡心俾稱厥職今體察得數年之間其盜用失陷短少及糜爛等糧一十六萬四千餘石又察得至元五年未到倉糧一十五萬餘石除已納失陷外八萬九千餘石至今不知運納所在就間得知事朱英與所察相同問者省部摘差部官親詣盤點真本司欺昧止將六年糧數總作已運入納隨倉別無見在飾詞破說用相抵牾中間虛冒明不可信緣為至元五年守凍糧斛一十五萬餘石於去年終俱報作揚州守終人數目至今年二月終尚八萬九千

餘石不知所向却稱至元六年糧數至今年九月終隨倉起運交納止有二千餘石且綱運先後交輸經期自有次第不應換亂如此豈有五年未畢委棄不問而復越漕六年新糧恐萬無此理詳此一端其虛冒飾說槩可見矣參詳上項事理不過非其人故也蓋自古錢穀大計莫不精選才能清慎明著善於其職者克固非素不綜練挾私蠹公之人可以倚辦因體察得本司官屬其最者按自行間素乏心計剛愎自用不有同僚佐貳者因不和同互相雄長上下苟且因仍耽悞遂失關鈐致綱紐解弛廢壞如此至於中外聞者莫不憤嘆其在有司理當云何其劉暹又於通州等處為起蓋倉教用便已私營置物業撤橋



梁而阻滯驛程奪民利而一空舊渡倉司既非久計  
運道又不快便公私之間兩有所害今復改作重費  
國用其爲私蠹害又所當問照得欽奉

聖旨節文該勾當了的公事不稱所倚付的心據劉  
景等廢亂職務不稱所倚孰大於斯據本司官吏不  
爲盡心大失閑鈐宜一切替罷公選廉能清慎善於  
其職者克及隨路河倉揚村守凍失陷損壞已未納  
見在糧數乞選差清幹職官親詣盤點如此度望上  
下一新積弊可革不然無以救勵其餘以救將來外  
據都城內外倉分有無照依漢唐故事隸屬司農司  
兼行管領深爲長便某職司言責利害深重愚衷所  
激誠不敢避忘罔盡所言合行一就糾呈

論復立博野縣事狀

照得至元三年欽奉

聖旨節該州城畸零去處不滿千戶者斟酌改併民  
戶多者從長定奪更當衝要驛程不須改併欽此今  
體知得自去年新抄戶後隨路州縣往往有至三四  
千戶者至今依舊合併管領極有不便當者畧舉順  
天路初州博野縣併入蒲陰縣分是也其博野縣即  
目諸色人戶二千八百餘戶中間百姓事不便當者  
非一如科着船戶補闕蒲陰縣弓兵故將本處上戶  
商堅等六戶取克及撥降一切差役徃徃偏向不均  
至於送納賦稅勾攝聚集詞訟等事不惟徃復遠寫  
其沙塘磁三河經值秋夏水發潑漫相接抵祁州迤



東一槩流行阻滯人難又兼本縣蠡州南至安平界  
首相去七十餘里正當衝要驛程爰自合併已來節  
次失過盜賊截劫訖官民財物致傷人命者無慮十  
數就問得本處人戶買佐等與所察相同叅詳博野  
正縣理合依舊復立縣事深爲安便外據隨路見併  
州縣如新抄戶後數滿千戶之上者亦合從長定奪  
復立舊治爲當至於隨路在先曾合併縣分爲中間  
百姓不便已有復立去處如上都縉山平灤撫寧真  
定贊皇太原樂平俱係三五百戶縣道又如無城邑  
者亦復設立如河間無棣縣於八湖口置司延州延  
津縣於史迥店置司順德廣宗止於本鎮置司是也  
據此合行舉呈

### 論科舉事宜狀

伏見

朝廷發明詔議科舉以取進士蓋欲明公道廣仕途  
以革徵競之風選人材取實用致隆平之化然聞禮  
奇所擬止以經義詞賦兩科取人伏慮淺狹拘牽於  
國於士兩有未盡必期登俊良遠庸鄙總覽群材經  
理世務蓋有後其所先先其所後者矣鴻惟

聖天子渴於文治聽言如流凡所制作取唐爲多兼  
國朝科舉之設自戊戌以後未是再議天下之士往  
往留心時務講明經史捉筆著述一尚古文顧惟舉  
業侈素習一旦取非其人不適於用返爲科舉之累  
矣今檢會到李唐之制其取士科目不常宰相時置



科以待非常之材其初試殿試止以策問取人如時  
務則試方略止五道直言極諫等策秀才則博學宏  
辭及道侔伊呂才堪郡縣下筆成章茂材異等皆其  
選之首也故得士之多唐最爲盛以其愚見審量時  
勢必欲急得人材以收實用莫若以時務對策直言  
極諫切中利病有經畫之略者爲首選何則試以殘  
宋爲言自渡江以來以一隅之地偷生百年者正以  
多士濟濟崇尚議論有用之學故也其次以博學宏  
詞兼試典禮議一道如禘祫禘禘之議者爲中選其  
經義詞賦兩科乞轉經出題先爲布告中外使學者  
明知所鄉謂如今年書明年詩限以幾時然後赴試  
其格律畧除苛細如故實景象明水干羽金在鎔之

類例皆爲命題如此不致隔礙長材使得展手筆以  
盡其器能不數年則五經可以通治矣然後使天下  
之人知

大聖人制作出於尋常萬萬其有用實學爲

聖朝英特之選一洗遼金衰蕪不振之氣其不盛歟  
如此當國計者上可以副

朝廷用儒之實下可以待俊造非常之士盡貴賢於  
網羅收實用於中外則文治之功隆平之化可計日  
而待矣其職當言責事或未便不敢緘默輒冒昧敷  
陳

彈博州路烏總管老病狀

今體察得烏古論居貞殘忍嗜殺貪負自無厭向列東



曹以尸祿位及審囚徒大致違錯今年近八十氣志昏耄當官臨事轉首遺忘就問得本路司吏張玠與所察相同而又不時昏發頭目調眩至提視衣物畧不知識庶望裁斷如流神明其政不可得已兼照得博州路輓管軍民三萬三千餘戶一方休戚繫在師帥今而若此其於大小事為少有蹉跌斯民何辜橫被抑屈若以老病不勝本官首宜論列合行糾舉以勵其餘

冬旱請祈雪事狀

切見隨路蝗災經今數年山東河南其勢尤甚今遺種遍地儻災更不已飢荒盜賊何所不有若此及出冬已來得三兩大雪庶可消弭以絕根種古語有云

冬雪一尺蝗子入地可丈今去春節僅三十餘日照得中都及迤南路分自八月至今天不雨雪小麥青黃半掩乾土雖雲陰屢作終無大潤參詳唯有以精誠感格神明致禱岳瀆為民祈謝而已不然令各路總管府官或郡守躬親祀禱部內山川并社稷等神以示朝廷憂卹元元至意庶望和氣一回普霑嘉瑞使民心慰安且忘積年飢乏撲滅之苦

太廟祭器合改造事狀

伏念古之君子朝服祭器不假於人况太廟之祭器乎今體訪得太宮大祭所用鼎彝等器多係殘宋賜功臣家物如臣京敏中邦昌等器是也參詳自古有國有家者未聞



祖宗神靈而以人臣所用遺器陳列為享於禮誠為未宜然嚮者清廟初建每事草次未遑一新不得不爾今後合無改造新器張皇一代緝典且極夫尊嚴無上之義使

聖子神孫傳之無窮不其盛且當歟

論求仕官就家聽候宣勅事狀

體知得吏部先奉中書省劄付該求仕官員每季遷轉在後慮恐生受擬令每月銓銓切見隨路求仕官員有自去年八月間摘勾到部經今七箇月餘未蒙銓轉中間百端生受客寄守待措借無所以致典賣鞍馬等物給盤費尚然不足不幸更值病疾因而身故尤可於卹即日在都聽除等官約二百餘員少者

不下半載又州縣闕員甚多但此淹延兩為未便今後合無將求仕人員自到部月日為始限以旬月對憑引驗既畢省會還家若有合祇受宣命官員依舊例差人擎送外據授

勅官員將合授

勅命發付各路總管府收管令本路祇按照依定去裝束省限催督赴任庶免人難據此合行呈覆

彈大興府擅注案牘官事狀

今照得隨路總管府元設提領案牘官已是罷去今體察得大興府却將司吏韓仲禮充案牘官勾當參詳總府司吏除額設外尚不得增添人數今來本府擅自將報過司吏韓仲禮擬作首領官與朝省差設



經歷知事一同繫歷勾當豈惟干名犯分其於格制是屬違錯據此合行糾呈

彈四州濫給解由事狀

欽奉

聖旨條畫內一款諸監臨之官知所部有犯法不舉

劾者

減罪人罪五等糾彈之官知而不舉劾者畫內亦成罪人罪五等糾彈之官知而不舉劾者畫內

一款節該各路州府司縣任滿官負當該官司循情濫給解由體究得實申臺呈省今察到涿州等處州縣去官於任內侵使訖盜錢工俸累蒙上司追徵並不還家其代官到任亦不依公理問却行循情濫給與無粘帶解由如此違互欺昧上司致將合追錢鈔至今不能到官事屬違錯據此合行開坐糾彈

彈甲局官王魯等抵撻造甲皮貨事

欽奉

聖旨條畫內一款節該造作不如法者委監察糾察

欽此又照得上司元料每甲一副舉吊并裁線古羴

皮一十張四分前制府劄付下甲局總管府該依年

例計料厘勒人匠如法成造無致用別色低歹皮貨

抵撻成造卑職於今年八月內體察得中都管甲局

官王魯揚三合自今年二月內造作至元五年常課

已造訖甲一百二十副依已料閱訖古羴皮一千二

百四十八張於內却用馬項子抵撻即問得王魯等

招說為闕少古羴皮上是用馬項子作線是實却問

得守支古羴皮人高庭傑熟皮提控案榮解自至元



六年六月內收支成造五年皮甲古羶皮至七年八  
月內計收到古羶皮一千二百五十三張俱係甲局  
王知事支訖又問得王知事名居實稱實閑訖古羶  
皮一千二百三十張據已造了底甲數內委的四次  
用訖馬項子八十五箇折訖古羶皮一百七十張是  
實今來卑職參詳既知事王君實依料節次閑支訖  
上項古羶皮貨玉魚等不合却用馬項抵搪事屬違  
錯合行糾呈

論革罷撥戶與煽爐冶事

今切見各處鐵冶撥出戶計設立頭目管領周歲額  
辦鐵貨令人戶常川煽煉納官官民兩便今畧舉秦  
陽并之石烈楊都事高徽合所管四處鐵冶見分管

戶九千五百五十戶驗每戶包鈔四兩計該鈔七百  
六十四定今總青黃鐵二百四十七萬五千六百九  
十三斤半價直不等該價鈔四百六十八定二十三  
兩三錢三分半比包鈔應官二百九十五定二十六  
兩六錢半及其人戶俱各漫散住坐每遇秋冬煽煉  
逐旋勾集徃復人難豈為官民有辦如將上項戶計  
罷去當差許從諸人自治窰冶煽煉據官用鐵貨給  
價和買深是官民兩便據此合行具呈伏乞御史臺  
照詳施行須至呈者

秦陽

戶二千七百六十四戶每戶四兩計鈔一百  
二十一定單六兩



辦鐵七十五萬斤每十斤價鈔一錢計鈔一百五十定

乞石烈

戶一千七百八十六戶每戶四兩計鈔一百四十二定四十四兩

辦鐵二十六萬斤每斤價鈔一錢計鈔五十二定

揚都事

戶二千戶每戶四兩計鈔一百六十定

辦鐵五十三萬二千三百三十三斤半每十斤價鈔一錢該一百六定二十三兩三錢半

高撒合

戶三千戶每戶四兩計鈔二百四十定  
辦鐵九十三萬三千三百四十斤計鈔一百

六十定內

青鐵五十三萬三千三百四十斤每十斤價鈔一錢計鈔一百單六定三十三兩四錢

黃鐵四十萬斤每十五斤價鈔一錢計鈔五十三定一十六兩六錢

糾彈良鄉尉司非理拷勘劉德林事狀

欽奉

聖旨條畫內一欵節該巡尉捕盜官捉獲盜賊隨時



發與本縣圍坐推問是實解赴本州再行鞠勘施行  
不得轉委使及弓手人等拷問欽此今體察得良鄉  
縣尉司於至元七年九月內夜本縣館驛內失盜於  
當月二十五日有弓手高伯山涉疑捉到涿州人戶  
張德林不曾申官私下拷勘抑令虛招及妄指姐夫  
劉得林寄藏止項贓物將劉得林拿到亦不申官一  
面拷打為無證佐在後撒放於二十七日止將張德  
林申發到縣尉司有縣尉楊仲玉又將劉德林勾追  
到官重複拷問非理加刑上為無指證明白事跡於  
當月三十日保放還家有劉德林於閏十一月十三  
日因拷窘身死今問得尉司司吏劉君祥并苦主劉  
得林妻阿張并當元被撥人劉得用詞因俱與所察  
交鈔衣物有此違錯據此合行糾彈

論肅山住等局人匠偏負事狀

伏見呂合刺兒管民戶內撥出人匠二百二十五戶  
內謂如真定路養參謀甄榮祖吳信魏友係納三定  
包銀戶計餘者雖是不及例各酌中戶計然則一丁  
入局全家絲銀盡行除免近又將上項戶計撥付本  
局另行官領其人匠自來按月支請米四斗鹽半斤  
不時更有賞賜錢物其為幸民無甚於此如肅山住  
備普花兩局人匠俱係迤北人匠拋失家業移來中



都令全家入局造作又為衣食不給致有庸力將男女質典者至甚生受按月支請又無食鹽每口止得官糧二斗五升今來切詳造作乃一體工役然成造之物固有輕重工役各無閑歇何其鹽糧不一若將上項局分相比據肅山住儲普花兩局實為備員外據呂合刺所管民匠二百二十五戶月支塩糧合行從長定奪據此須合具呈

論六部職掌繁簡事狀

伏見

朝廷設立六部其官吏品秩相同而職掌繁簡有異如禮兵二部禮以祭祀為大而有太常寺兵以軍旅為重而有樞密院今者錢穀造作一切等事盡歸工

工至其繁劇若曹務不有所分則緩急難於辦集人無酌量繁簡令兵禮二部將可分之事一以兼管似為便當又且職掌均一使兩部官吏免尸素之責不然繁者愈繁而簡者日簡矣據此合行糾呈

論霸州道路事狀

切見霸州部分俱該河流陂浸地面其驛程却係山東正路據本州南至保定縣見行西道相去四十五里中間經過橋梁七座每歲必須依時拆蓋更有修疊水口去處其功役不細須旁縣挾濟方可辦集甚是生受兼西道元係前代阻障溇泊堤堰本非正路近一十七里止蓋橋梁三座若行莫金口東道官民是為兩便據此合行呈覆



論革罷魚牙岸例事狀

伏見魚牙岸例等錢比年以來隨路俱無今體察得中都通判等一十一處其魚牙岸例一依宣課三十分取一至今徵收參詳魚貨薦葦一切諸物於所在已納數重課程今者於上更爲收分此等錢穀寔是重併兼見蒙

聖恩免差發減課額正爲百姓生受故也據上項等錢理宜罷去不然亦不當依宣課一體分收有此不應合行糾呈

彈不孝子揚大事狀

蓋聞父母有婢子甚愛之雖父母沒終身敬之不衰况父在之婢妾乎今體察得懷孟路總管子某其頑

無知悖逆有迹近者將父才妾就於寢所輒行毆擊父方營身護隨即推仆致令乃父襟發本路究治其同僚看徇視爲細微在後畧無施行雖行路聞之莫不憤疾參詳禮義由賢者出豈有衣冠之胄而爲禽犢之行如是其敗壞風化孰大於此合行糾彈乞痛加懲戒以勵薄俗

舉三道按察使事狀

今山東東西河北河南山北遼東三道提刑按察使見行關負未經選注如山東道前任陳祐苟非其選罔繼前聲河北道近爲元維新事闔司被問威望沮弱山北道上係重地關負日久此三使舉惟其人能復震疊安靖切見前中書省給事中賈君真揚歷



朝省積有歲年夙夜在公練達政體又廉訪得濟南府總管趙炳莅政迺來民安盜息強幹著稱及吏部侍郎王椅通儻才能和而有守既掌銓衡又稱公言論其才品俱各相應如任以監司必能振舉綱維不負輿望據此合行舉呈

論順天清苑縣尉石昌璞繫獄事狀

切見隨路州縣官如縣尉人負職小主負重竅為不易其合捕盜賊有任終不獲至經年累月停罰俸給者幸有一二強幹肅清所部宜加遷賞以勵其餘或事有望悞情寔可恕今體訪得順天路清苑縣尉石昌璞強幹有為巡捕得法察賊推情遂破窰穴自到任已來甫及一年擒捕強竊及印造偽鈔知名劇賊郝

榮揚留兒等凡一十七起計賊黨九十八名俱係積年作過流毒數州所在官尉皆不能制所謂不待教而誅者也致使保州方數百里間道途清寧稱頌在路誠消弭安靜巡捕之最者也今止為郝榮等事被問到部本部即行枷收同重囚繫獄寔為未當參詳據已結案強賊郝榮等反獄殺人情理深重舊例劫死囚殺人者無首從皆處絞斬彼郝榮拘執死囚已成得劫况石昌璞依奉府命摧拉凶威俱有折傷因之損死度其情節誠可恕原蓋公心除害之理多私計故殺之意無據所犯設若抵罪理合照依舊例量情施行佞為相應兼本官前後敗獲賊數合得未給賞賚實多將功贖過亦不至此不然恐當斯職者遠



近聞之因以解體使賊輩潛知幸快禍心且長其剽劫侵牟之勢深為未便據此合行申理

論隨路交鈔庫令總管府提點事狀

至元八年六月初三日  
尚書省陳教記

夫時有通塞事貴改更故古人因時制宜不拘常法而憚變更也切見隨路鈔庫行用元寶鈔數多者三五千定少者不下二三千定每歲差設庫官止憑一二保官即聽注擬近年已來如失陷去處雖監督正人及着落元保頭管陪納數足至經涉數年往往有破家不能結絕圓備者兼保官多不親即故出於一時面分又何嘗計保者家產之虛實錢穀之果能通曉也方今鈔法極是通快但委用非人少有侵陷便是一路鈔法因之為累少有滋滯足滋長奸弊與其

治於已然無可耐之後何若防於未然易為力之前愚見今後合無公同選舉其抵業信實委通錢穀人負勾當就令本路總管府官每月以次計點見在題押赤曆其府官却不得因而恃勢借貸官錢違者許庫司申覆上司照驗如此使朝夕得相臨視上下迤互關防官無失陷之虞人遠奸欺之弊照中統元年已來已曾依上施行至是便當今各庫雖按月赴提舉司申報單狀赤曆於關防寔無所係蓋非切近臨視中間作弊既無畏避又不能即時知覺究治是申押本司徒常例虛行而已據此合行舉呈伏乞照詳定奪施行

論待關官預為照會各處事狀

卷之八  
七二



切見省部將隨路守關官負不計月日遠近受除后  
即行下各路照會曰某年月日某代某甚者至於預  
往任所守待要結所在風俗凋弊致一方吏民將舊  
官輕視滅裂或督責所行則曰汝計日去官耳見任  
者既為齟齬不苟且保祿為心以俟其去者幾何人  
斯如此是官府吏民上下離合且使無事猶云不可  
况軍民宣課工匠一切事務今皆取辦州縣中間脫  
有失悞利害所關非輕今後合無除將守關人負令  
抵受還家聽候外省部驗赴任月日既近然後照會  
各路但為未晚能然庶幾官民去留之際兩得安便  
不致上下苟且耽悞一切事務深為便管據此合行  
奉呈

論外任官展裹公服事狀

切念古人制作冠服蓋所以別上下而尊嚴也今者  
隨朝百官與隨路管民官上自宰相總府官下至簿  
尉其品從散官俸祿公田子孫廕叙等事畧皆備具  
獨公服展裹之禮未見施行合無照依舊例使各官  
自備冠服公聽展裹理事如此不惟見

國家禮文有漸其於官府威儀實為尊崇

論撫勞襄陽軍士事奏狀

切惟古之用人能盡力忘死者不過下通物情閱其  
勞苦說以使令而已兼兵以氣為主所貴感發振作  
不致有憊怠墮歸之意成役雖久事功可成伏見襄  
陽之役以十萬衆頓堅城之下經今四年暑天炎瘴



攻守暴露不戰而疫死者無日無之即日已屬炎瘴  
江水向發設如去歲夏宋人復以舟師來接內以窮  
寇必出相應其利害所關非輕當此正帥臣籌畫之  
秋將士竭忠之時也今省官雖節制於上  
朝廷固宜特與撫勞感發人心振作士氣以恤所敵  
此以夜戰聲相同晝戰日相見之意也以某愚見合  
無聞奏選差近侍信臣奉將

恩命詣彼軍前宣諭撫慰使功過兩明賞罰必信然  
後存其情而閔其勞使三軍之士僉曰我之生死有  
所歸矣我之勤苦為上知矣既喜如此雖以歲月置  
之重地人將奮發忠義心力一殫勇氣百倍而親上  
死長以謂當然所謂說以使民民忘其死且使煩暑

可變為清涼矣兼襄陽窮寇料其時勢日就困蹙以  
宜重懸賞格射書城中諭以禍福有能禽致主帥或  
番城出降者授以其官其賞至於軍校預謀有功各  
以次論授外據老弱疾疫軍人既非精壯可用復使  
疫氣蒸染又為未便有無分揀暫還休養如此則人  
有所望去留兩安故兵法云視卒如子可與俱死兼  
丞相史公去歲已曾如此施行師律軍心兩寔真順  
以時勢觀之據上項事理恐是一法伏乞御史臺  
照詳聞奏施行

論宣課折納米粟實常平倉狀

切見隨路起蓋常平倉教二千餘間已是功畢今秋  
豐收見得官為和余以實倉庫便然有未便者如近年



上郡中興西京等處和采糧斛所委官吏往往作弊  
官錢既為欺隱糧斛又不敷足隨復差輟省部官打  
筭追徵經隔數年不能結絕不惟官司紊煩公家急  
無所濟體訪得去歲

尚書省為山東道軍闕乏糧儲將附近州郡課程折  
納米粟接濟甚是便益合無照依已行事理越夏麥  
收成及向前秋收將農民六色課程約量折納粟豆  
等物公私寔為兩便免致有欺隱紊煩之弊據此合  
行奉呈

論州縣官經斷罰事狀

切惟禮義廉耻國之四維諺又云無瑕者可以戮人  
今切見仕途之間廉耻道喪賦濫公行自立部以來  
州縣職官往往賦濫不公經值斷罰者每選不下數  
人例皆遷叙不過降等邊遠而已衆詳爵祿者勵世  
磨鈍之具據見行降遠格例係亡金弊法固非懲惡  
勸善之道似不足取兼州縣字民之官務要宣明教  
化禮義興行乃所任責彼身經斷罰處民之上豈惟  
內懷慚德先不自安部內之民將何化服欲望四善  
具五事備難矣照得唐例職官任終驗所犯輕重有  
數年停勒之法合無依倣定奪如賦濫不公罪應罰  
俸至幾貫以上及經斷及若干者今後盡行停廢庶  
幾懲一勸百遠去甚者不致敗群使士興廉耻之風  
俗被肅清之化四維張皇內外之職修矣



秋澗先生大全集卷第八十九

秋澗先生大全集卷第九十

便民三十五事自此條監司時建白

皇帝聖旨中議大夫治書侍御史行御史臺事伏見  
朝廷勵精爲治百度從新中外顯顯有太平之望  
然弊積日久事端非一必更張其大者重者使有  
定制則實惠可及於民今

國家疆宇民數遠過漢唐歲入經費又爲不貲所  
急者立法選官恤民息兵力養人材節浮費之用  
停不急之務而已蓋大法立則宏綱振庶官舉則  
萬務修兵民安則邦本固人材廣則任使周省費  
用則百姓足停不急則農務勸至於侵奪民利不  
便於時者一切革去之然此要須大臣力任其責



以經國遠圖為念使治體一定始終無間開誠心  
布公道授群材而作行之使上有所守而不勞下  
知奉行而不亂尚虞緝勒未嚴吏有勤墮明其賞  
罰黜陟以威厲其不事事者將見激昂奮發人爭  
立效則治定功成可計日而待也不然究錢穀之  
已然緩綱維之大柄似未見其可也某以不材繆  
當言責區區之誠有不能自己者謹條陳切時便  
民三十五事開列于後伏乞

御史臺備呈

中書省照詳施行

事目

立法

定法制

置發兵符契

通行奏事

選官

議保舉

立審官院

選參佐

卹民

議恤民

除軍戶拋下差發

抹災

秋稅準喂養馬駝草料

復常平倉

論匠戶

括戶土斷

七品已上官言任內利病事

息兵力

軍人交番

合併十一年軍三



緩遠征二

定奪析居地稅

養人材

設學校

用試中儒士

試吏員

節費用

古者因官府而立人今因人而立官府

併州縣省官吏

行券法減祗應

禁醞酒

振武屯田

輸粟充監當官

停不急務

權停一切工役

省罷鐵冶戶

侵奪民利不便等事

課程再不添額 論鈔法

論盜法

輝竹還民

分間官占民田事定奪官地給民

禁約搔擾百姓五事

立法

定法制

自古圖治之君必立一定之法君操於上求作成  
憲吏行於下視為準式民知其法使之易避而難  
犯若周之三典漢之九章一定不易故刑罰省而  
治道成今

國家有天下六十餘年大小之法尚遠定議內而  
憲臺

天子之執法外而廉訪州郡之刑司也是有司理之



官而闕所守之法至平刑議獄旋旋為理不免有酌量準擬之差彼此重輕之異合無將奉敕刪定到律令頒為至元新法使天下更始永為成憲豈不盛哉若中間或有不通行者取國朝札撒如金制別定敕條如近年以來審斷一切姦盜

省部略有條格者州縣擬行特為安便此法令當至定之明驗也如此則法無二門輕重當罪吏無以高下其手天下幸甚

置發兵符契

竊見

朝廷防馬劄妄濫也

御前發奉使欲遠方取信也佩圓符為徵况兵戎大事乎近者王著矯偽發兵利害非細合議開防契勘歷代緩急調遣軍馬甘驗符契然後得發今後合無依上起置符契庶免臨時別致事端

通行奏事

竊見

憲臺初立遇有軍國重事

中書省臺院約會一同

聞奏若事或不便許庭議以從所長其於

朝廷大為有益近年稍乖舊制至於大政大刑其事已行不得與聞任言責者既不及論救且得箝口不職之謗於天下乞請申明舊例不致似前閣略以絕



壅蔽天下蒙幸

選官

議保舉

夫親民之官守令為急竊惟選法自近年大壞後府州司縣官例多阿權通賄僥倖而得其南選尤濫至目之曰海放此等賢否不較可知庸懦者因循苟且奔走承奉外政務盡廢小材者視時所尚營治已私略不以官事為念爰自新政已來外望雖聳根源舊弊依前未除易舊而新今雖汰冗濫選材能然一或譽之則為賢一或毀之則為否是非惑亂終無所憑莫若將素有聲跡資品實至者令三品官入狀舉保量短長之材授小大之任然後明察臧否精覈殿最

得人者行進賢之賞謬舉者坐不當之罰舉官自然精詳受保者惟恐有累如此則官得其人庶事修舉昔周世宗令除目仍署舉者姓名若貪穢敗官並當連坐亡金正大間亦行此法當時號稱得人方今教養無素科舉未行權宜矯弊似為良法

立審官院

竊詳省院臺部皆得選署官屬若公當則人心自服少或未安中外之人皆得指言數年以來省臺壞亂多此之由夫省臺大僚近

君之重臣也古人稱投鼠忌器當尚深戒况天官天秩一旦使群小無知者得恣情阻壞非所以體重臣而存大體也兼若輩處心鮮公不為己私且泄怨謗



此之若此合無立審官院選用有德望公正大臣次  
取知典故識大體剛直而敢言者為之輔其中外一  
切選舉官負通得論列而疎駁之不猶愈於若此紛  
紜之不定也檢會亡金章宗時臺司用一諸科人為  
監察審官院竟奏而罷之致臺望增重遠近肅然當  
時大為有益或曰若立此官臺諫何為曰臺諫論列  
至廣審官係封駁之事古人設立本意以用人為治  
之本惟其責之專則事精詳而得實理所為開公道  
而庶人不私議也伏乞熟慮而深思之

選參佐

近聞

朝省選用隨路總管其法甚妙然參佐尤當精折所

謂掌司經歷者務要識大體有議論通素曠臨事不  
疑剛正有斷振一路之紀綱辨大小之衆務下至調  
和官府驅役吏人上下伏從官長有賴方為稱職近  
年往往用非其人不惟誤事且復害事如非流望者  
有之不通文墨者有之老病疲懦不勝任者有之如  
得其人斯弊盡絕契勘至元二年隨路總管許令帶  
行參佐二員此固唐自辟所知良法今既妙選大尹  
亦宜令各官保所知職官以任參佐却恐朋黨成風  
因時作弊莫若將保到人負交相為用如真定府尹  
所保用之保定保定所保用之他路之類是也若本  
人在內汙濫不職保官亦行坐罪其各道按察司首  
領官亦當依上精選夜出總府幕職之右庶幾官吏



推服 臺網人望因之取重

郵民

議郵民

竊見隨路百姓自攻取襄樊已來節次將中強等戶  
簽充軍站其見在下戶供給百色軍須已是生受及  
江南平定中外佇望庶得休息復致前政煩苛橫取  
白著急於星火州縣官吏視其如此因緣作弊科歛  
無度如遇和雇和買夫役等事即驗包銀分俵每一  
兩過歲約出橫泛錢三十餘貫止以四兩力論之是  
一歲着二十倍也又軍戶逃戶閃下差稅復灑見戶  
包納割剝民肌未見如此之甚致愁嘆不絕感傷和  
氣歲旱不收百物踴貴衣食艱得民安得不困救之

之方在於將和雇和買必不可闕者畫時支價兩平  
和買雇賃併不科俵民間飢荒去處官為賑濟累年  
逋負已徵入官者還民未徵者盡免其逃亡復業者  
村无拋事產量免三年差役庶居者安集而去者樂  
還然後下寬大之

詔布告中外使民曉然知

朝廷憂恤元元本意又聞阿合馬及其黨與所沒贓  
賄不可勝計此物既非天來皆係生民膏血向肆威  
虐聚為已私可謂賊穢不祥之物昔漢籍梁冀家財  
遂充國用減天下租賦之半散其苑囿使業窮民合  
無亦將上項財賄全代今歲天下租賦之數使二十  
年愁怨之苦一旦消釋誠



國家結民心感和氣曠蕩希世之恩過於尋常萬萬也  
一照得近年和買造作等事其弊有三如立限甚  
促畫時不支價錢必須科配民間然後可辦致  
百姓添價轉買或官吏接攬多搭錢數及取納  
使用糜費等錢上下通同作弊一也縱降到價  
錢止依各處虛報時估比之百姓實費不及半  
價虧損人戶二也其官降不敷價錢內官吏又  
行尅減且有全不到民或三五年間並不給降  
者三也如近日科下真定皮裘皮袴明該不得  
椿配百姓官無見錢皮無見在送納有程却恐  
耽誤不免分科民間其弊依前復作是上司實  
有愛民之意而百姓虛受其惠也欲革其弊不

過給降見錢從實支價責委正官辦集其事何  
則蓋近年遇有工役官長畏其利害但領略而  
已一委本把里正信實等人使之營辦將百姓  
恣行侵牟無有紀極或事發到官止將上項人  
等量情追斷其事已然將何所益今若革去三  
弊將一切違錯明該止坐正官不究餘者庶幾  
多方用心顧恤百姓不致諸人作弊  
一隨路遞運車仗脚錢近者五六十貫遠者不下  
百貫官支價錢十不及二三其不敷數百姓盡  
行出備名為和雇其實分着年來披搭極是生  
受乞請驛程去處官立車甲頭兩平雇覓從實  
支價以舒民力



一戊戌年中選徭戶比之僧道百分無一前省收  
入民編却有告難蠲除者合無依舊除免併十  
三年試中儒人亦行一體定奪

一弛山林河泊材木魚蒲之禁令民恣得採取以  
拯飢乏不足

### 蠲免軍戶閔下差發

一爰自收復殘宋已來入皆有息肩之望近年差役  
豈惟不蒙減免却又將九年十一年元簽軍戶差發  
每戶止除四兩餘上數目俱於見在戶內搯并及自  
戊午年准申逃戶之後續逃戶計上司並不準申州  
縣亦不敢申報閔下差發仍令見在戶計包納又至  
元七年收勘出協濟戶計元奉

條畫止令協濟見當差戶近年却行入額另行科差  
加以和雇和買不絕如流比之初取襄樊差役轉增  
數倍上司若不哀矜量加優卹恐不免轉徙流離之  
患乞將元簽軍戶氣力全行除豁及取勘續逃戶計  
蠲免分數庶望貧民少得休息實為便益

### 拯災

竊見今歲真定等處春夏亢旱穀菜皆無米價踴貴  
小民父已闕食往往採食青棘槐花榆葉拂子等根  
加之流竄驚擾甚為不安謗云春旱泥倉秋旱離鄉  
蓋言比接新來歲月日遠故也百姓多趁熟河南今  
聞米粟亦貴又無所往是將坐視飢饉以待其斃其  
救之之術宜在於早設不然不過發倉廩散楮幣倉



稟所在皆空寶鈔幾許得濟莫若將被災州縣合納  
稅石并即今收糴事故等糧盡行倚免使百姓少寬  
且謀自救責委按察司親臨官吏多方計置賑濟飢  
乏及弛山林河泊之禁權停門攤酒醋等課庶幾不  
致流亡失所

### 秋稅唯喂養馬馳草料

竊見保定等路百姓每歲撥赴遠倉送納又椿配和  
買各位下馬馳所用草粟設立倉場官收支中間官  
吏作弊百姓重併生受如按察司每歲各處追首鈔  
有三五百定者盡係添答多取於民若於百姓所納  
秋稅內盡行折作草粟赴各處喂養馬馳倉場送納  
使民免遠倉納稅之勞無和買椿配之擾及革去給

降尅減之弊實為便益

### 復常平倉

竊見至元八年設立常平倉驗隨路戶數收貯米粟  
約八十萬石以備緩急接濟支用近年已來起運盡  
絕甚非

朝廷恤民採荒本意如往年差官定奪時估以平物  
價縱使能行終非久遠通便之法當時僉謂若常平  
有粟各路不過依時價出糴三千石則物價自平  
人心倚安低昂權在有司兼併不復高下其手向前  
收成去處依前收糴以實常平恐亦恤民平估之一  
策也

### 論匠戶



一省部為各處富強之民往往投充人匠影占差役以致靠損貧難戶計奏奉

聖旨差官與察司總府一同磨勘到各戶報脚氣力手狀已是精當類攢用帳各路赴部分間寔為善政中外喜望比及今歲科差必得上項富戶依應當差庶幾貧難稍得息有近聞省部止為外路帳冊體式與大都不同此上差官復同三家再行磨問不惟中間動搖寔恐延有失人望若將已分間定帳冊勒令各路照依大都體式攢報似望善政早得成就或謂若依已行體例將匠戶富強者還民當差其見當身役止除一丁差稅却恐一家兩役日久靠損入難終致紛紜不定莫若將見行分間匠戶委係高手人匠存者存之外據戶眼高手藝平常者放罷為民若必須補添再於民間將酌中戶內取手藝極高者充庶免紛紜不定且失民望其江南戶口一家分作數戶其名甚多其數不實

括戶土斷

國家自壬子歲抄數後迄今未嘗通檢中間等第高下大成偏重故唐制三載一定戶每歲一團貌恐因仍舊額貧者轉貧富者愈富况三十年之久稍候年歲豐收民大安息合行從實檢括察其存亡均其貧富則庶功以興國富家足不然是縱令州縣每歲增減高下以滋官吏之弊故前人云與其潛資於姦吏何若均助於疲人以免其偏苦哉其各路流徙戶計



抽下差賦即令盡行椿灑見戶陪納往往靠損人難  
今四海一家民之去此則為逋逃寓彼則為見在若  
通行括數只令彼處土著當差除此之逃額實為便  
當此歷代遺制我如行之不為無例或曰恐涉動搖  
曾不思偏重包納不均之苦甚於一動多矣

七品已上官言任內利病

竊詳方今大弊

國之惠化下罔盡行民之情偽

上不周知今後合無令外路五品官部內利病可以  
與除者許令任內或秩滿赴部直言要以指陳實事  
一出已見庶使民間疾苦艱難悉得  
上聞其官之盡心與否不校可知其當與除者即諭

所司施行日新政治誠表裏相維上下盡心之良法也  
息兵力

征防軍交番

一隨路軍人爰自南征已來城攻野戰萬死一生及  
平定江南舉望停征稍得休息今軍前勾起逃亡事  
故等軍歲無虛月如父死子繼兄亡弟行以至一戶  
有病沒陳亡父子兄弟四五丁者又有死絕止存老  
父母與妻孥者尚然不蒙撫存况征南將校例多迂  
賞其軍士合無將見此戍軍士亦宜優卹或二年或  
三年使之分番相代省家父母親戚歲時有相會之  
樂所謂悅以使民民忘其死契勘唐制征防軍年及  
者還民父母八十者聽一子歸侍况今四海一家正



息馬論道之秋如兵戎少寢天下幸甚

緩遠征

伏見方今

聖德天覆海宇一家獨以日本未霑  
王化致煩征討竊詳倭奴自後漢始通中國多以義  
懷未未聞專事征伐蓋限隔洋海數千里之遠此與  
彼接我以衆命先嘗其險嗚呼殆哉昔三苗來格虞  
帝以修文為先彼倭始通光武以廣德為務伏望  
聖朝鑒法前代先遣材辯緩遠之臣申之以文告喻  
之以逆順乘以文德結以恩信使民見包荒不遐遺  
之意若猶未至然後興師未為晚也此係  
國家大事任責者宜悉心以明其利害

合併十一年軍

竊見近年

朝廷將舊軍與至元九年所簽軍貧難消乏之家皆  
行合併甚為便益其十一年所簽軍人當時已是近  
下戶計經今九年多有生受不堪役者合無一體從  
實合併使貧富難易兩得均平又得兵力精強且見  
國家同仁一視之意

定奪軍戶析居地稅

一軍戶析居貼戶即日見行取要地稅當間本是一  
戶謂如有田六頃除四頃外納餘上稅石既是析居  
其地兩分各有地三頃不在合納之數即日止憑一  
戶時取要餘上地稅理合分間定奪除免



養人材

設學校

夫自昔設立學校非唯尊師重道蓋欲養育人材以備內外任使方今名儒碩德既老且盡晚生後輩以上乏教育下無遠望例皆不學而吾道不絕如綫設若構一大厦必用衆材可成况治天下之廣居乎今府州縣道雖設立教官講書會課止是虛名皆無實效其隨處教授名實學官餬口不給奚暇治禮義而及人若與醫學一體給俸祿復官撥學地資贍生理然後選職官子弟及鄉民之秀異者使之入學專以講明經史以趨有用實學不三五年間一處止有成材五七人則天下可得數百人以須

國家之用豈不偉哉如已後設立科舉尤須預先教養不然將見數年之後非惟無才可取則禮義廉恥掃地矣將何以論治乎隨路醫學亦合一體整理施行不致虛請俸錢有名無實

議復立國子學

一竊見至元七年

朝廷立國子學命許衡為祭酒選

朝右貴近子弟令教授之不滿五歲其諸生俱能通經達禮彬彬然為文學之士及其入仕皆明敏通疏果於從政如子諒侍儀之正大子金中丞之剛直康提刑之仕優進學弟親臣之經明行修堅韋君永之識事機子亨待制之善書學企中客省之貞幹揚歷



省臺蔚為

國用豈小補哉必欲設學校養人材京師首善之地宜先復立

國學以風勵天下

用中選儒士

竊見十三年隨路試中儒人於內多有材堪從政者若委自各路并按察司取勘相驗得實申報上司遇臺院六部百司按察司令史書史闕員以憑補充勾當是猶勝繆亂雜取州縣無例無學等人此輩設若吏業非素終是通曉義理例有文筆使官事稍習皆可勝用假令學校吏試便行需待歲月猝急不能得用能此不但捷於得人亦是激厲天下為

學之方豈為小補兼亡金舊例臺掾書史皆於中場舉人內試補勾當但在有司持擇使之精當不致妄濫請托而已

試吏負

竊見方今內而

省部臺院百司外而按察司府州司縣合用吏負俱出自州縣校書帖寫等人因而上達以至僥倖成風廉恥掃地只以學術無素選取無方中間求其廉慎可稱熟煉吏事者甚鮮而天下之務繁而詞訟錢穀重而刑名銓選生死曲直高下與奪悉出於乳臭若輩之手欲望治道清明風俗美好難矣合無講究近代考試法式從府州官公共保舉其法律刀筆行止



或不相應罪及保官其餘非此而進者不許補充隨朝勾當設法既嚴人自力學如此非惟用得群材禮義廉恥風動四方下可以革去僥倖苟且之人上可以成公平肅清之化端本澄源此最急務

節費用

併州縣省官吏

伏見方今州而為府縣而作州復有不必縣而縣者此蓋王進建言欲務為誇大以示外方意也以至增置人貲添給俸祿無有虛歲彼所臨戶口曾不加多差稅轉成虛耗所謂十羊九牧為政大弊也今四海一家郡縣版籍何止數倍誇大之名將何所用不若依舊便將當省者省可併者併豈惟事簡官清不致

國家緣虛名而受實費既省其官據祿薄者亦宜增而厚之蓋清其吏而不厚其祿則飾詐而不廉知厚其祿而不省其官則財費而不足知省其官而不知選其能則事壅而不理此三者迭為表裏相須而成者也又江淮興兵已來諸道使府一切把軍官負權宜而置職及見設提舉司官及因聚賭妄立官府者多矣亦宜減削使職有常負事不繁冗則人無紛擾之勞矣

行券法省祇應

今訪聞得真定路週歲祇應錢萬有五千餘定以天下計之不下數萬定矣此緣

省部差遣繁冗及當該官吏因之作弊致費用如此



之廣雖禁約閑防甚悉不若澄治本根今後若路官得人凡事公幹并將急遞鋪整點如法據行下事務嚴立程限管得時刻不誤如是則不必使者旁午而重費館穀也若軍國大事必須差官者照依前金給付券頭據合得分例令於上批寫某日經過某日宿頓回日繳納年終將報到祇應文冊按照同否稍有差別多取與多與者同罪將見使人不敢多取掌行者不能妄添分毫節省費用誠為方今良法至於朝廷重使別議給與如此減省故不少矣

### 禁醞酒

一目今自真定路已南直至大河地方數千里自春至秋雨澤愆期早曠成災致米麥踴貴無處糶買例

皆闕食百姓往往逃竄莫能禁戢有司誠宜多方計置救災恤民竊見民間醞造杯酒所用米麥日費極多略舉真定一路在城每日蒸湯二百餘石一月計該六千餘石其它處所費比較可知若依至元十五年例將民間醞造杯酒推行禁止庶幾省減物斛以滋百姓食用誠救災卹民之大事也

### 振武屯田

竊見每歲北邊於新城沙井靖州三倉和糴糧儲不下五七萬石如遇軍馬調遣又豈特十萬石而已近年穀價踴貴且以十萬石為率所費不貲用度終不寬廣兼自古饋餉雖有智者終無良法惟邊地屯營最為長筭契勘唐憲宗元和七年李絳言天德

今豐州是也



振武左右良田約萬餘頃擇能吏可開置營田以省  
費足食從之四年間開田四千八百頃收粟四十萬  
斛歲省度支錢二十餘萬緡今體訪得振武并豐州  
界河兩傍地廣民稀除營帳牧放百姓耕懇外其餘  
荒閑地尚多若差公幹官僚踏視其宜留兵營田一  
切取武清屯例假以歲月自非水旱不熟田功稍集  
國儲必有所濟故陸宣公云緣邊土沃而又荒所收  
必厚如此費省食足官無規措和糴之勞民免輸納  
虛耗之費恐亦安固邊防之一策也

納粟除監當官

竊見

上都北邊每歲

臨幸及屯戍重兵歲用糧斛甚廣雖官為和糴  
商旅與販終是遠寫不能多廣得濟昔漢文景時亦  
為艱於轉致令民輸粟塞下賜與爵級謂之賣爵級  
遂致邊兵饒足方今院務官別不見入仕格例以曩  
日論之不過貨賂請托若以弊革有益於

國家不若令辦課官驗額輕重使輸粟

上都及迤北州郡幾何者則任其處監當官一年立  
為定制謂如某處務場周歲課額十定設官二員每  
員輸米或粟

上都者若干迤北州郡者如此不半歲

上都及緣邊州郡便得米數千萬石豈不大便益哉  
又如州府務官經營幹勾比得差遣所費不貲一任



之內必百方作計取償於民羨餘復入於己是使明  
損民力暗將官錢盡入私門若此法一行將見私錢  
盡入公家則息奔競官革請托軍國坐收饒足之利  
故令民輸粟充院務官最為當今良法  
停不急之務

### 權停一切工役

竊見

大都雜役五臺施木等夫及諸寺院營造比年已來  
未嘗停輟古人有云工不使鬼必待人興財不天來  
終須地出不動百姓將何所求况今真定至大河迤  
南年穀不登百姓替替例皆乏食自採不暇據上項  
工役似合權且停放以見

國家罷不急節浮費救災卹民至意

### 省罷鐵冶戶

竊見燕北燕南通設立鐵冶提舉司大小一十七處  
約用煽煉人戶三萬有餘週歲可煽課鐵約一千六  
百餘萬自至元十三年復立運司以來至今官為支  
用本貨每歲約支三五百萬斤况此時供給邊用雖  
所費浩大尚不能支絕為各處本貨積聚數多其窺  
利之人用官司氣力收買其價不及一半當時既是  
設立提舉司煽煉本貨以備支持除支外止合存留  
積聚以備緩急今來却行盡數發賣竊詳此事虧官  
損民深為未便今來止合依驗舊日有名曾煽爐座  
存留三五處依例興煽據煽到本貨除支持外盡數



存留積聚並不許發賣外據近年新添去處悉行停  
罷將所占百姓分撥所屬州縣依例當差仍許諸人  
認辦課額興煽小爐或抽分本貨或認辦鈔數臨時  
定奪如綦陽鐵官中統二年  
省部已曾將治戶差發比較歲煉鐵貨數甚爭懸以  
此罷去其便與否乞追照元卷備見其詳  
侵奪民利不便等事

課程再不添額

契勘課程自四十年前天下正額止萬有餘定今者  
從萬至於十倍可謂極致每歲考較尚有增餘前省  
定奪歲歲添作正額且財不天來皆自民出恐亦因  
人之一節也兼商稅金貨物貨湊集買賣多寡市肆  
迂移皆趙州郡會合津要去處歲各不常若累累一  
體添替恐有輕重不等之弊可依已定額數外從實  
核辦或依相承法增籌者量加迂賞否者黜罰停歇  
昔年告叙所增等第以五十定為上三十定為中二  
十定為下如此民喜額定而不增官樂有功而陞用  
羨餘之數自然盡實入官

論鈔法

竊見元寶交鈔民間流轉不為澁滯但物重鈔輕謂  
如今用一貫纔當往日一百其虛至此可謂極矣究  
其所以法壞故也其事有四自至元十三年已後據  
各處平準行用庫倒到金銀并元發下鈔本課銀節  
次盡行起訖是自廢相權大法此致虛一也其鈔法



初立時將印到料鈔止是發下隨路庫司換易爛鈔以新行用外據一切差發課程內支使故即造有數儉而不溢得權其輕重令內外相制以通流錢法為本致鈔常艱得物必待鈔而後行如此鈔寧得不重哉今則不然印造無筭一切支度雖千萬定一於新印料鈔內支發可謂有出而無入也其無本鈔數民間既多而易得物因踴貴而難買此致虛二也又總庫行錢人等物未收成預先定買惟恐或者先取故視鈔輕易添買物重幣輕多此之由此致虛三也又外路行用庫令庫子人等私下倒易多取工墨以圖利息百姓昏鈔到庫不得畫時回換民間必須行用故昏者轉昏爛者愈爛流轉既難遂分作等級其買

等除

搭價然後肯接此致虛四

謂救其虛莫若用銀收鈔大路止用得課銀一餘定小處一二百定民間鈔儉必須將銀赴庫倒鈔貨是鈔自加重銀復歸于官矣今却以鈔回則愈致于虛矣何是又官只重銀不重其鈔此復虛一也或更造銀鈔以一伯當元寶二伯進漸收見鈔蓋事久則變變則通輕重相濟之法也不然利病又當問中統元議立法者如張介夫王紹明等講明舊法以定新行如此年載間庶可復舊使資財大柄常操於上權不移於下矣

論塩法

竊詳調度塩法以便民為心者莫若於所轄州縣量



戶數多寡將元認課額均分依已定價錢一十四兩一錢仰各處管民官設立塩官赴運司開支塩貨置局發賣

納舊課開新塩挨次送納其泐路脚錢於各處塩局官用已錢出備却於發賣塩價上搭帶仰各道按察司不時計點多餘之數

既分塩課為正額聽從各處從實發賣中有比別路賣不盡去處督勒本處須管驗合開數目依限開支課亦依期送納何故當元驗民戶多寡均分食塩之家既等緣何却有不盡數目防有私塩生發仰各路正官提調不致阻滯正課亦不須設立巡塩官擾民其先行賣訖去處必須再來開支是為增餘近年以

來人口增添食塩既多別無虧缺止有增羨可不勞而辦也

一官為調度者從

省部差有根脚慎行止諸錢穀人充規措所官聽運司節制於用糧去處設立許諸人赴倉送納或米或粟納獲朱鈔赴規措所開引支塩近見運司官差規措官於南京等處不問人之貧富有無抵業九一抽分虛立文契指於某處中納粮斛其實將引到家不問價直高低貨賣了當或償舊債或納官錢或別作營運至今五七年間錢粮不能到官者不可勝計深為未便今者止合明出榜文召募諸人於所措倉分先行送納粮斛納獲朱鈔然後赴規措所支引次來



關鹽厘勒監主母得刀蹬停滯立便支發似此別無  
阻礙鹽法大行倉廩充實不須和糴和中豈小補哉  
一長蘆本處除收米粟外並不得收受諸物止收寶  
鈔赴萬億庫送納止收米粟者以備

御河上下官為支持不收諸物者諸物官司無用中  
間作弊不無阻礙鹽法若以收鈔納鈔其便有三一  
則鈔法通快二則革去舊弊三則官民兩便

一便商賈為利者許諸人赴場買引關鹽厘勒監生  
不得刁蹬客旅最為急務蓋禁官吏不得買引賣引  
是也既許諸人與販官吏亦用已錢何故不可若使  
本管官吏得買其間客旅深為未便課程不能虧辦  
何故蓋價貴則官吏盡數拘買客旅不能得買鹽價

賤則官吏並不收買客旅為曾赴場不能得買嘗被  
耽悞又知鹽價遲滯亦不與販虧損官課皆此之由  
又官吏買鹽先揀離場近便去處次揀潔淨乾白好  
鹽又不依序先行撓支使客旅人等無所措手其弊  
不能一一徧舉竊惟鹽場天下號為爭利之所况本  
管官吏乎蓋防微杜漸尚有不能禁者以官物為已  
有之資放縱由已可不戒哉

一運司上下大小請俸人負近七百名其中虛設者  
大半行戶部都轉運使之名可易為提舉鹽使司大  
使副使各一負次以管勾催煎足以辦集自然官減  
俸省亦便利之一端也

一解州池鹽天然自成不同清滄犯本煎造費用浩



大往年陝西運司為課額重大立法頗峻山谷遠人不知禁忌食既艱得未免私煎冒販事發到官情罪不小往往有破家殘生者良為可哀昔隋初罷酒坊通池鹽鹽井之利與民共之至今稱為仁政若於見定解鹽價直內更為減免分數使民易得食用亦國家惠民而不費之一端也

### 輝竹屬民

竊見衛輝路輝州園竹皆係百姓自來栽植置買物業軍站差徭仰之出備自姜毅建言將頃畝官量見數斫伐四六抽分民得六分官亦拘取量給價直當時百姓已是不堪近年已來不依時月不問去留恣意斫伐盡行殘廢其合得價錢給既非時多不完備

又巡竹人等經絲往來稍有疑似恐嚇錢物事非一端往往有破家失業者百姓至願視竹植甚於仇讎竊詳天之生物本以養人今過為害豈造物意哉且量頃畝無多抽取四分以之輸官未為大益百姓得之實非小補合無將上項園竹依舊令民為主官不抽分出備一切差役氣力亦寬弛山澤之禁不奪民利之美事也若謂於係官竹法有礙據輝竹造到器物令給引印烙亦可通行其見設提舉司並不將竹園優蔭名為辦課專以侵擾百姓營治已私為務亦宜罷去令總府就便管領其省官吏息民擾實為便當

### 分間官占民田

一總庫將東鹿縣民田以為官地約一千四百餘頃



每歲包納麥課每畝麵三斤合無除免明諭百姓使  
為永業

一去歲取勘到滑州

御麥地畝約八百餘頃中間多係軍站農民祖業莊  
產種養年深今來一例打入數內理合分間民田令  
依舊為主

定奪官地給民

一京兆路州郡所有營盤草地極廣舊為探馬赤牧  
馬地面近年遷往西州屯駐其地悉為閑田并隨路  
營盤草地寬闊去處量給側近無田農民種養併贍  
不足

禁約侵擾百姓





